



SESI bergambar bersama peserta Orang Asli.

HARGAI ALAM SEKITAR, HIDUPAN LIAR

11 pelajar UPM sertai program 'Orang Asli Initiative' di Maran, Pahang



Fatin Farhana Japre
gen.y@hmetro.com.my

Seramai 11 pelajar dari Fakulti Pengajian Alam Sekitar (FPAS) Universiti Putra Malaysia (UPM), Serdang menganjurkan program 'Orang Asli Initiative' (OAI) di Kampung Orang Asli Batu 55, Maran, Pahang baru-baru ini.

Program selama tiga hari dengan kerjasama YSEALI YOUUnified Malaysia, Jabatan Kemajuan Orang Asli (JAKOA) dan Bahagian Hal Ehwal Pelajar UPM ini bertujuan memberi pendedahan dan meningkatkan kesedaran dalam kalangan masyarakat Orang Asli Maran khususnya lingkungan umur 13 hingga 17 tahun terhadap pengurusan dan penjagaan alam sekitar serta hidupan liar.

Orang Asli Initiative turut mendapat kerjasama pihak JAKOA Daerah Maran, Jabatan Perlindungan Hidupan Liar dan Taman Negara (PERHILITAN) Maran, Malaysian Environmental NGO (MENGO), Yayasan Hijau dan iM4U.

Pengarah program, Hasifullah Ibrahim, 25, berkata, peserta bersama-sama 31 Orang Asli diberi pendedahan mengenai kepentingan memulihara hidupan liar terutama spesies terancam di Malaysia.

"Menerusi program ini, peserta dari UPM khususnya secara tidak langsung mendapat peluang menjalankan program khidmat komuniti dalam usaha memperluaskan pengetahuan dan kesedaran masyarakat mengenai isu alam sekitar yang semakin membimbangkan pada masa kini.

"Kami diberi informasi fakta isu dan tindakan penyelesaian mengenai hidupan liar melalui modul yang dirangka serta sesi ceramah daripada PERHILITAN.

"Selain itu, kami turut menyediakan aktiviti permainan interaktif berkaitan haiwan terancam, kuiz, kerja berkumpulan, pembentangan, membina monumen secara berkumpulan menggunakan barangan kitar semula dan tontonan video.

"Secara tidak langsung, program ini menjadi platform terbaik untuk kami mempertingkatkan kemahiran komunikasi dan membina hubungan baik dengan masyarakat Orang Asli serta belajar cara hidup mereka," katanya.

Katanya, pendekatan



SESI pembentangan mengenai haiwan terancam.



secara kreatif dan interaktif yang digunakan oleh fasilitator bukan saja menarik minat peserta program bahkan mendapat pujian ketua kampung dan komuniti Orang Asli lain.

"Kami rasa gembira kerana program ini berjalan lancar dan dapat berkongsi segala ilmu yang ada dengan banyak pihak supaya sama-sama peka kepentingan memulihara alam sekitar dan hidupan liar," katanya.



11 pelajar Fakulti Pengajian Alam Sekitar Universiti Putra Malaysia Serdang.